

PEMBERITAHUAN PERTANYAAN
DEWAN RAKYAT MALAYSIA
MESYUARAT KEDUA, PENGGAL KELIMA

PERTANYAAN : SOALAN BUKAN LISAN
DARIPADA : PUAN HAJAH SITI ZAILAH BINTI MOHO YUSOFF
KAWASAN : RANTAU PANJANG
TARIKH : 3 OGOS 2017
NO. SOALAN : 479 (PR-1352-T01059)

SOALAN

Minta MENTERI PERDAGANGAN ANTARABANGSA DAN INDUSTRI menyatakan jumlah peningkatan kos import dan eksport akibat penurunan nilai ringgit dan cabarannya sehingga kini

JAWAPAN

Tuan Yang di-Pertua, kejatuhan nilai Ringgit Malaysia bermula pada separuh masa tahun 2014 seiringan dengan kejatuhan harga minyak mentah dan komoditi global. Walau bagaimanapun, prestasi perdagangan Malaysia kekal berdaya tahan.

Bagi tempoh 2014-2016, semasa kejatuhan nilai Ringgit, Malaysia masih mencatatkan peningkatan jumlah dagangan yang positif: Pada tahun 2014, sebanyak RM1,448.35 bilion jumlah dagangan telah dijana dengan peningkatan sebanyak 5.8% berbanding tahun sebelumnya. Manakala pada tahun 2015 sebanyak RM1,463.13 bilion dicatatkan dengan kenaikan sebanyak 1% berbanding tahun 2014. Pada tahun 2016, jumlah dagangan telah berkembang sebanyak 1.5% kepada RM1,484.6 bilion berbanding tahun 2015.

Dari segi sumbangan eksport, jumlah eksport bernilai RM765.42 bilion telah dijana pada tahun 2014, RM777.36 bilion pada tahun 2015 dan RM785.93 bilion pada tahun 2016. Masing-masing merekodkan pertumbuhan sebanyak 6.3%, 1.6% dan 1.1%.

Selain itu, jumlah import meningkat sebanyak 5.3% kepada RM682.94 bilion pada tahun 2014, berbanding tahun sebelumnya. Pada tahun 2015, import berkembang 0.4% kepada RM685.78 berbanding tahun 2014. Manakala bagi tahun 2016, pertambahan sebanyak 1.9% telah direkodkan kepada RM698.66 bilion berbanding tahun 2015.

Dalam tempoh tersebut, Malaysia telah mencatatkan lebihan dagangan sebanyak RM1,448.35 bilion pada tahun 2014, RM1,463.13 (2015) dan RM1,484.6 bilion (2016). Lebihan dagangan yang dicatatkan pada tahun 2016 merupakan kali ke-19 berturut-turut sejak tahun 1998.

Jadual1: Jumlah Dagangan Malaysia pada tahun 2014-2016

Tahun	Eksport (RM' bilion)	Import (RM' bilion)	Jumlah Dagangan (RM' bilion)	Pertumbuhan Jumlah Dagangan
2014	RM765.42	RM682.94	RM1,448.35	5.8%
2015	RM777.36	RM685.78	RM1,463.13	1%
2016	RM785.93	RM698.66	RM1,484.60	1.5%

Sumber: Jabatan Perangkaan Malaysia

Berdasarkan analisa ini, pengeksport cenderung mendapatkan manfaat yang lebih berbanding pengimpor akibat daripada kejatuhan nilai Ringgit. Selain itu, impak kejatuhan nilai Ringgit adalah berbeza mengikut industri.

Kesan susut nilai Ringgit dapat dilihat dalam industri pembuatan berasaskan sumber yang diimport seperti sektor jentera, automotif dan barang makanan termasuk produk tenusu yang menggunakan bahan mentah diimport, yang boleh menyebabkan peningkatan kos pembuatan.

Bagi industri perabot berasaskan kayu, minyak sawit dan sarung tangan getah, susut nilai Ringgit telah memberi kelebihan dari segi daya saing eksport kerana kebanyakan input yang digunakan adalah dari sumber tempatan.

Secara keseluruhannya, kejatuhan nilai Ringgit telah meningkatkan daya saing eksport bagi sektor berasaskan sumber tempatan manakala barang berdasarkan import mengalami kenaikan harga.

Kementerian juga menyarankan agar syarikat Malaysia mempertimbangkan kaedah perlindungan nilai mata wang (hedging) dan menggunakan mata wang alternatif seperti mata wang Renminbi (RMS) dalam transaksi perdagangan dengan negara China. Syarikat Malaysia juga dinasihatkan agar mengurangkan komponen sumber luar (sumber import) dan menggunakan sumber tempatan dalam penghasilan barang.

Sekian, terima kasih.